

ILLUSTRISSIMO AC REVERENDISSIMO

**D. D. NICOLAO FRANGIPANE**

COMITI

IMP. ORD. AUSTR. FRANC. JOS. I. COMMENDATORI

EPISCOPO CONCORDIENSI

NUPERRIME CONSECRATO

SUAM SEDEM NUNC PRIMUM ADEUNTI

**EMMANUEL KAUBECK**

CANONICUS ADRIENSIS

EX ANIMO GRATULATUS

DUM ILLUM OMNIBUS PRECIBUS ET VOTIS PROSEQUITUR

D. D. D.

PATAVI TYP. SEMINARI MDCCCLXVI.  
E. Kaubeck cur.

Illustrissime ac Reverendissime Præsul!

*P*reclare virtutes, quas in Te, Præsul Illustrissime ac Reverendissime, admiratus sum Concilii Prot. Veneti tempore, quo mihi Te novisse, Tuaque humanitate, colloquio et consuetudine frui contigit, jam tum me Tibi ita devinxerunt, ut ex illo summa observantia, grato animo et amore Te prosequi nunquam destiterim.

Quapropter ubi primum Te ad Episcopalem dignitatem merito erectum accepi, illius, qua per-fusus sum, lætitiæ argumentum aliquod proferre institui; grandia licet tenuis conarer. Hinc quum nonnullos hymnos in laudem Divi Bellini Episcopi exararim, illos Tibi dico.

Hoc Tu, qualecumque est, rogo, boni consulas, Tuamque mihi pastorem benedictionem impartias.

## CHARITAS



Quæ mira efficiat, quantaque perferat,  
 Cui pectus superis ferveat ignibus,  
 Bellinus, decus et gloria Præsulum,  
 Exemplo docuit suo.

Hic, quidquid studio gens hominum cupit  
 Insano, teneris spernit ab unguibus,  
 Atque hæret Domino corde fideliter,  
 Dum terram pedibus premit.

Hic, fratrum numero quemlibet asserens,  
 Mœrentes reficit, pauperiem levat,  
 Educit pueros, lenis et excipit,  
 Ignoscitque nocentibus.

Sed vis nulla, minæ nec fera vulnera  
 De recto solidum tramite dimovent;  
 Quin mortem impavidus, propositi et tenax  
 Pro Christi oppetiit grege.

Præsta, summa Trias, quæ regis omnia,  
 Bellini ut meritis nos tua Charitas  
 Inflammet penitus, justitiæ et viis  
 Cæli ad gaudia provehat.



## FORTITUDO

**D**um Christi ovile cladibus  
Cives cruentant perfidi,  
Pastor superno numine  
Bellinus illuc mittitur.  
Ille et rapinas viribus  
Arcere totis cogitans,  
Et dura corda flectere,  
Ad bella tendit aspera.  
Precatur, obstat, increpat,  
Ceum miles acer dimicat;  
Ast in dies rapacium  
Crescit luporum immanitas.  
Sed perstat in sententia  
Heros moveri nescius,  
Nec, quæ sibi teterrimi  
Struunt satellites, timet.  
Quin fronte læta his protinus  
Se tradit, atque Ecclesiæ  
In asserendis juribus  
Vitam renidet ponere.  
Largire, summa Trinitas,  
Ut fortitudo Martyris  
Jugi in tui nos roboret  
Confessione Nominis.

## PATROCINIUM



**B**ellini ad Aram gestiat  
Devota plebs procumbere,  
Sanctumque Nomen Martyris  
Lætis celebret laudibus.  
Defendit Hic concredito  
Curæ suæ Pastor gregi  
Infecta tabo pabula,  
Sæva ac luporum guttura.  
Et præliatus fortiter  
Vitam dedit cum sanguine,  
Exempla miri roboris  
Christi relinquens asseclis.  
Nunc sacra in arce siderum  
Vultu beatur Numinis,  
Præsens Patronus Adriæ,  
Quam dexter usque proteget.  
Et quidquid Illum flagitent  
Rite, impetrabunt supplices,  
Testantur ut miracula,  
Queis Illius mors claruit.  
Testantur et qui tabidis  
Canum petiti morsibus,  
Hoc porrigente dexteram,  
Semper fuere sospites.

Hosticæ haud illas rapuere turmæ,  
Non edax tempus nocuit, nec undæ  
Fluminis rupto in patulos refusi  
Aggere campos.

Singula hæc vidit, modicasque partes  
Extulit testes pius ipse Præsul,  
Quum modis miris penitus reclusit  
Martyris urnam.

Sit decus summæ Triadi per ævum,  
Quæ beans cœlis animas fideles  
Splendido in terris pariter sepulcra  
Augēt honore.